



Tiga ditahan disyaki terbabit mengemukakan dokumen palsu untuk mendapatkan pinjaman berjumlah kira-kira 4.2 juta pound (RM23.1 juta).

(Foto ihsan SPRM)

Tiga termasuk warga Korea Selatan disyaki kemuka dokumen palsu

Kuala Lumpur: Tiga individu termasuk seorang warga Korea Selatan ditahan kerana disyaki mengemukakan dokumen palsu untuk mendapatkan pinjaman berjumlah kira-kira 4.2 juta pound (RM23.1 juta) bagi membeli puluhan kenderaan terpakai.

Semua suspek berusia lingkungan 30-an dan 40-an itu ditahan di Ibu Pejabat Suruhanjaya Pencegahan Rasuah Malaysia (SPRM) Putrajaya antara jam 5 petang hingga 12 tengah malam kelmarin, selepas masing-masing hadir untuk memberikan keterangan.

Sumber memaklumkan, dokumen palsu terbabit dikemukakan suspek kepada sebuah syarikat antarabangsa yang beroperasi di ibu negara.

“Warga Korea Selatan itu adalah pengurus besar di syarikat antarabangsa berkenaan dan dipercayai bersubahat bersama dua lagi individu.

“Mereka dikatakan mahu membuat pinjaman itu bagi tujuan pembelian 24 kenderaan terpakai dari luar negara pada 2015,” katanya.

Pengarah Kanan Siasatan

SPRM, Datuk Seri Hishamuddin Hashim, ketika dihubungi mengesahkan penahanan terbabit dan memaklumkan kes disiasat mengikut Seksyen 18 Akta SPRM 2009.

Katanya, pihak SPRM mengemukakan permohonan reman di mahkamah pada pagi.

Sementara itu, Majistret Mahkamah Putrajaya, Shah Wira Abdul Halim membenarkan dua suspek termasuk pengurus besar terbabit direman selama tiga hari sehingga Jumaat ini, manakala seorang lagi direman lima hari sehingga Ahad.